

Joanna Sodzawiczny II miejsce 2023 r.

Cera, Matka, Babcia, Oma

Ta historio jest blank wymyślono ale czy to znaczy że niy mogła się komuś przytrofić naprowdy ?

Osoby:

Cera - Maja, frela kańs wele 25 lot

Matka- Mirela, mo coś wele 20 lot wiyncy łod swoi cere.

Babcia - Marta, mo już tyła lot że żodyn ji niy bydzie liczył kedy urodziła Mirele.

Oma -Maria, przed łozymdziesiontkom abo i po. W każdym razie jest w takim wieku że mo się dużo rzeczy w rzici.

Bina I

Siedziom wszystkie sztyry baby we izbie, chyba siedziom już jakoś chwila bo każdo mo szolka z kawom i talyrzik z zistom.

Mama: Majeczko a ty czamu tak cicho siedzisz ? Nic nie godosz ...

Babcia: Co prowda to prowda.... je ci co ?

Oma: A dejcie dziotsze spokoj ...

Cera: bo jo się rozwodza

Oma: Jezderynie tako gańba... rozwod w naszy familii

Mama: Dziołcha co to godosz!!!! Dyć dziepiero żeście ślub brali, nawet dwa lata jeszcze ni ma....

Cera: Wiym.. Oma rozwod to ni ma nic takigo.

Oma: Jak nic takigo? Przed Ponboczkiym żeście przysięgali i serwać to, to ni ma nic takigo ?

Cera: Oma rozwód to tera je normalno rzecz. Dwa podpisy na papierze, poraset złotych do kasy i fertich, po ptokach... Wielkie mi mecyje...

Mama: Majeczko ale co się stało?

Cera: Niy chca ło tym godać

Mama : Niy lyj się żurym. Godej nom sam zaro co się dzieje ? Dyć takeś pszoła tymu swoimu Robercikowi. Jeszcze miesiąc tymu żeście się z dziubków wyjodali a tera naroz rozwód ? Już wiym... Łon na pewno mo jakoś baba na boku Bydzie to prowda ? A pacz tak mu dobrze z łoczow paczało, taki dobry synek... nale chop to jes inoś chop. Jak za jakomś keckom polecie to ni ma się go co trzymać... polecioł roz to polecie i drugi.... Ale że tyn nasz Robercik... jo go durś miała w zocy... Ale nic to cera, wynajmnymy adwokata, ponoć cera moi koleżanki skończyła prawo i tera mało kery ij w sondzie podskoczy.... Wiym, wiym yno podpis styknie ale my puszczymy pierona w samych fuzeklach łoboczysz... A ty se znojdiesz jakieś fajnego szaca...

Cera: Przestoncie jo niy chca żodnego szaca a Robert ni mo żodny baby na boku... Na pewno niy... Pryznajmni jo nic ło tym niy wiym...

Mama: Bo baba to się zowždy na końcu dowiaduje, wszyjscy już nałokoło wiedzom a baba durś niy. Ty się yno koleżanek popytej, łone już na zicher coś wiedzom...

Cera: Mamo przestoń,to ni ma tak...

Mama: Ja dziołcha tak se to tłumacz.... jo tyż tak godała, że niskoro przifazi z chałpy bo mo robota, abo jakoś fucha u kolegi, z kolegami do szynku poszoł, inkszym razem zaś pana chycił bo kogoś z roboty odwoził i zanim jakeś koło spaczeli to już dniało... Dej se dziołcha pedzieć a niy być tako gupio jak jo była.

Cera: Mamo czy ty chcesz mi padać że łociet cie zdradził ?

Oma: A bo to roz ?

Cera: Oma wyście ło tym wiedzieli ?

Babcia: Pół wsie ło tym wiedziało ..

Mama: Yno ło ty piyrwszy, za drugim razym już się bardzi staroł...

Oma: Taki się twoi mamulce trefił typ z wadom kręgosłupa...

Cera: Jakom wadom ?

Oma: No z dupom na boku...

Cera: Oma! Wy i te wasze żarty! Mamo czamuś ty łod niego niy poszła ?

Mama: Kaj? Tyś była maluśko twój bracik mioł się dziepiyro urodzić .. kaj jo miała iś ?

Cera: Tata cie w cionży zdradzoł ? Jo by od takigo chopa poszła....

Mama: Jaa tak se tera godej, kaj byś poszła z dwójkom małych frupków ? Bez piniyndzy..

Cera: Do babcie! Prowda babcio że ty byś jom wziyna nazot do dom?

Cisza

Mama: Pamiyntej cera jak cie chop roz puści kantym to mosz jak w banku że drugi roz tyż pódzie! Także tyn... jak chcesz łod niego łodyńś bo wiysz że kogoś mo to zrob to tera. I mosz moje błogosławiyństwo. Ale zrob to drapko, chobyś floster srywała...

Cera: Niy mamo, to ni ma tak... łon mie niy zdradził... łon rod je przy mie... za cudzymi niy zaglądo...

Mama: Eli tak godosz...

Cera: Mamo ale wyście z łojcym są szczęśliwy tera pra ? Dyc non stop kańs furgocie, rajzujecie, chichrocie się.... przeca jo downo niy słyszała żebyście się o coś wadzili ...

Mama: Bo tak je! Przodzi było źle ale jakosikel my to szczimali. A potym... Łojciec doszoł do lot i do rozumu no i tera... Tera je dobrze...Ale wiysz wiewa nos to kosztowało ? Jak cie chop zdradzo to to w babie łostowo.. Za kożdymrazym jak je niskorzi z roboty to się zastanawiosz czy to zaś ni ma ta sama lajera. Ja dziotcha,tera my som cunzamyn ale niy zawsze było tak kolorowo. Toż posuchej matki jak mosz dobrego chopa Majeczko to ło niego dbej, dogodzej holkej ale roz za kedy nawciepuj mu wiewa wlezie żeby pieron mioł w zocy to co mo we chałpie.

Oma: Mirela nalejesz mi jeszcze trocha kafyju? A ty dziotcha powiydz, jak niy skuli baby to skuli czego ty chcesz go łodyńś ? Można skuli gorzoły pra ? Słepie ja ? Najgorzi jak zamiast chopa mosz pijoka, ożyroka abo ochlapusa..

Cera: A co to za różnica ?

Oma: Ochlapus przyłazi do dom ożarty idzie spać i w chałpie jest spokoj. Ożyrok przydzie nacinkany albo nabity, larmo zrobi, bajtle pogoni, teściowy nazdo i tyż pójdzie spać ale pijok..... Pijok kańs się nażgo, napiere albo nawali.... abo jeszcze gorzi niydopije. I jak do dom przydzie to w doma je cyrk na kołkach. Wajo i haja robi, w bajtle laczami ciepie... szolki czasko i jeszcze z gracami do baby sztartuje...Niy idzie go uholkać kej niy dopije i niy padnie tam kaj stoł. A rano to smarki, rzigi i jsochy łostawi ci do sprzontanio. Dziołcha jak tymu twoimu gorzoła smakuje to citej jak najdali.... Bo lepi było jak na zolyty przyłaził a potym to już może być yno coraz gorzi....

Cera: Niy oma, Robert niy pije ...

Oma: Jaaa? Jo pamiyntom jak było na moim gyburstagu... Pamiyntocie jak na się łozar ? Ochlapus pieroński do auta cza go było kludzić.

Cera: Oma na gyburstaku u wos to łon siod kole ujka Stefana a wiycie że łon niy wylywo za kragel.... No i jak Robert siod to już tak łostoł siedzieć.. ale to nie jego wina, łon niy wiedziol że Stefan każdego łozere... nawet farorza łozar, farorz potym społ przy fortce, we śniegu. Somsiod go znod i zanos na fara....

Babcia: Maja ! Dej ty lepi pokoj farorzowi..

Cera: Jo tam do farorza nic nie mom ale tak było forgot... Oma a opa pił ?

Oma: Niy Majeczko niy pił, sępoł! Ochlapus był z niego jakich mało, ale jak se wypił to zaro grzecznie szoł do betów nynać. Haj niy robił. A jak cykniynty przisoł to jeszcze piniondzami bajtle dzielił. Tak na wesoło pił no ale wzion i umar. Dobrze że do pyndzyje dorobił bo przynajmi tera mom po nim jaki piniondz. Opa był jaki był ale chop łozyrok to ni ma nic dobrego.

Cera: Oma a powiydzcie jak się godo na baba kero pije gorzoła ?

Oma: Na to ni ma żodnego miana... To je tak złe że tego niy do się nazwać... Pamiyntej dziołcha że jak fater w chałpie sępie to bajtle zawsze mogom do matki polecieć się wyzolić. Bo matka łod tego je, pra Marta? Ale jak matka je nacinkano to kaj majom is ? Do fatra? Dyć chop to jes inoś chop.

Cera: Oma ale tera chopy som inksze, na pakerhala łazom, zdrowy futer jedzom, łoni nawet niy myślom o gorzole bo to yno puste kalorie a łoni chcom być wyzgerni, take szlangowy yno że synki. To już dziołchy wiyncy sępiom.

Oma : Jaaa to słyszałam nawet w telewizorze że tym godali.... bestoż ni ma bajtli kere by na pyndzyjo do starych robili i bestoż starziki takie jak jo ni majom pininydzy co by im na medykamynty stykło I to je na zicher prawda bo to w telewizorze godali..

Cera: Oma wy przestońcie łogladać te telewizory, lepi se jake sudoku rozwiążcie, to wom lepi na gowa zrobi.

Oma: Z ciebie to zawsze była pyskula!

Mama: Co prawda to prawda ale wiycie po kim to erbła? Gynau po Wos. Maja, powiysz nom w końcu czamu chcesz tego Roberta łodyńś?

Cera: No bo.... No bo..... Jo jednak niy chca godać....

Cisza

Mama: Maja czy łon kedyś.....

Babcia: Mirela jo się spytom... Majeczko... czy łon cie kedyś ukrziwdził ? Czy łon cie piznoł abo jakoś inaczy dugnoł?

Cera : Babcio Niy!!

Babcia: Suchej dziońszko take rzeczy się trefiajom. A tyn twój Robert to jest jednak kyns chopa, jak łon cie piźnie to...

Cera: Babcio naprowdy! Robert mie niy piznoł ani razu. Babcio to niy te czasy kiej chop baba leje. Dyc je Błękitno Karta, psychologi, Gopsy, dochtory, To już niy te czasy że baba dowo zwola na take rzeczy...

Babcia: Majeczko tyś je modo, ty jeszcze nic niy wiysz że życiu, łojce cie pod kloszym chowali ale.... Niekere chopy tak majom że żeby poczuć się jak richtig chop to muszom piznońć baba. Czasym fest, czasym lecy, czasym im styknie jak jom yno poszturchajom, czasym łostanie ojła, czasym yno boli przez poara dni a czasym je gorzi i uwierz mi że na pewno się żodyn niy spyto czy może piznońć...Yno piźnie A potym bydzie godoł że to niu jego wina bo wiysz chop mo sztresy w robocie, łon w doma chce mieć spokoj a jak baba niy zadbo żeby było tak łak łon chce to ... no czasym mu nerwy puszczo i przyleje ale ale to ni ma tak że łon tego chce. To skuli baby...to baba je winno..

Cera: Babcio ale ty fandzolisz... Jak chop piero baba to to yno jest jego wina, jego widzimisie i jego szpetny charakter. Baba może w doma niynawarzić, niyposchraniac, i może chopu nazdac jak mu się należy. Ale nigdy niy może dostać od chopa bez pysk. Nigdy. I żeby było do porzadku to baba chopa tyż niy może prac. Niy i koniec. A jak keroś baba myśli inaczy i dowo się chopu loć to chyba mo niy poukłodane klepki pod deklym.

Babcia: To jo mono póda umyć te szolki, przyniysz wom jeszcze kafyju abo co ?

Babcia wyłazi

Mama: Cera ty tyż niy wiysz kedy pysk czimać

Cera: Ale co się stało ?

Mama: Co się stało, co się stało? A co się miało stanoć ? Nawciepywałaś babci a psinco łoni wiysz.

Cera: No ale chop ni może baby prac... Czy łojciec kedy piznoł ciebie albo mie ? A opa omy ?

Mama: To jo twojego fatra po pysku loła aż się spamiyntoł, chocioż czasym mysla że i tak za mało...

Oma: Mie opa roz spróbowoł tyknąć, to coś się wajoł i mie chlasnoł a jo akurat przy piecu stoła, jakzech się zaro kopoczykiym odwinyła to tak po nyrkach dostoł że wiyncy się nie opowożył mie piznać ale Marta.. Marta to je cołkiym inkszo zorta ludzia. Łona łod małego było spolegliwo, a tyn ciulik Erwin umioł to wykorzystać..

Cera: ale myślisz że łon babcie....

Mama: jo niy myśla jo wiym !

Cera: Ale jak to możliwe ?

Mama: Niy podpadło ci że my się z mojom matkom wcale niy widujemy? Do ty drugi babcie jeździli my jak na sranie a do moi wcale albo blank wcale.

Cera: No niy, jak byłach mało to jo myślała że łoni daleko miyszkajom, het na gorolyji i bestoż tukej niy przyjeźdzajom ani my do nich bo fto by chcioł na gorolyjo jechać, a potym jakzech wyrosła to zech się nad tym niy zastawiała bo zawsze tak było że my ich mało widujemy.. może skuli tego że daleko miyszkajom.

Mama: Te no niy przesadzej, czidziści kilometrow toć to ni ma blank daleko.

Oma: Niy widujemy się bo tyn leber, jeji chop, niy zezwolo.. Dzisiej mo jakiś tref z roboty, pyndzjonisty się trefili toż doł ij zwola żeby matka odwiedzić. Można myśli że jo za chwila do bomboniery trefia. Znać dobry miot humor, ciekawe jak się łodegro?

Cera: A dugo tak już jes?

Mama: Łod zawsze łodkąd pamiyntom, myślisz że czamu jo niy miała kaj iść jak łojciec się szlajoł ? Jo tyż niyroz od dziadka wciroy dostała, niyroz zech ślimtała abo z ojłom łaziła. Gańba się było kańs pokozać. Matka mie broniła niy powiym ale kończyło się na tym że naprzod jo dostała a potym za matka się zabiyroł...bestoż jak yno mi się trefiło to jo zaro z chałpy pitała. Naprzod do internatu a jak przyszoł czas żeby nazot do chałpy iś to się twój fater trefił. Ślub my brali na drapko bo jo blank do dom nazot niy chciała iś. Wykludziłach się i miałach spokoj. Nawet te jego baby na boku niy były take złe jak to co by nos w doma czekało...

Cera: a wyście Oma wiedzieli ?

Oma: Przodzi niy, wiysz jak to je jak się modzi wykludzom. Marta czasym przyłaziła z bandażym albo w rynkom w gipsie ale godała że to się o szrank pizła, to ze schodow śleciała bo w tepich kopła, to zaś jom keryś w cugu zdugnoł.. I tak to leciało... A tyż Erwin poradził jom łod rodziny łodegnać.. Jak s niom było fest źle to ij kozoł do nos dzwonić że na wczaszy jadom, że żodnego w doma ni ma. Jom zawar a som się smykoł....

Cera: i co daliście tymu pokoj? Nic żescie nie zrobiły?

Oma: co my miały robić jak łon jom durś cygani, naciśnie ij cygańst do łeby i kopej się potym z koniym żeby to odkręcić

Mama: Co my miały zrobić ? Idź pogodej z babciom.. Ciekawe co łona ci powiy...

Oma: Roz jak było tak naprowdy źle to my tam z twojom matkom poleciały i tako była łostuda że jo w lazarecie wylondowała, jak mie gichnoł... sama niy wiym kiedy zech się spamiyntała.... Dwa tydzie miałach pysk nabrniynty. A łon potym żodny zwole niy doł żeby do nos przyłaziła a jak my do nich szły i we drzwierze klupały to udowoł że ich ni ma... Piżniynty jakiś.

Cera: Ale czamu łona łod niego niy łodyńdzie ?

Mama: A fto jom tam wiy? Mono Skuli farorza? Abo skuli tego co ludzie powiedzom ? A może skuli tego że matka durś pszaje łojcu ?

Babcia stoi w progu i się przysłuchuje

Babcia: Niy, niy pszaja mu. Jo go niynawidza. Jo już go mom downo pełno rzić. Marza ło tym żeby się z nim rozwiyć ale jak pódymy do sądu to jeszcze jo mu byda buliła piniondze za te wszystkie lata co łon mie uczimywoł. Do kustu piniondze łon dowoł, Jo nigdy niy robiła. Łon zawsze przynosił piniondze, jo swoich niy mom, to z czego jo byda go spłacać ? Powiedzioł że jak łodynda to łon policjo zawiadomi i łoni mie nazot przykludzom...

Cera: Babcio ale to som brednie. Czamuś ty po policjo niy dzwoniła jak łon na ciebie rynka dzwignoł ?

Babcia: A co jo im miała pedzieć ? Że mie ślubny leje ? Dyć to ślubny to może...

Cera: A psinco prowda! Niy może! Chop czy niy chop niy może cie piznońć i koniec! I ty żodnych alimyntów płacić niy bydziesz! Jak chcesz to jeszcze dzisioj z tobom do dom pojada, zebieresz bambetle i cie przekludzimy. A jutro wydrukuja papiory, wypiszmy i pódymy do sondu i się z nim rozwiedziesz. I bydziesz miała spokoj. Chcesz ?

Babcia: Chca ale Jo niy wiyom Majeczko czy jo mogą... a jak łon się niy zgodzi ?

Cera: Babcio łon ni mo nic do godki, i powiyom ci ciekawszo rzecz: to łon ci bydzie bulił Zgadzosz się ? Idymy...Podź, ni ma na co czekać, jużes doś s nim szczimała... Jo ci pomoga

Babcia: ale jo.... ale jo ...

Mama: Niy tak drap.. Cera dej to starce przetrowić.. to ni ma tak chup na krowa bydzie ciele... Zetrwej trocha. Mamo chcesz trocha tyju? Pomyślisz ło tym? Maja mo recht, dość już mosz ty mordyngi, a my ci przeca pomagomy. Pomyś ło tym a ty Maja pogodej yno ło czym inkszym... Czamu to się chcesz szajdować ?

Cera: Bo...bo...eh to gupio teraz tak godać .. *(baby paczom na nia wyczekujaco)* No dobra... bo łon mie nerwuje... No wiycie no.. łon by mi durś na bzdury robił.. Mie je lang ciepło, łokna łotwiyrom a tyn je zaro zawiyro bo po szłapach dre. Jak jo łokno zakmna to tyn je łodymknie ale do mola tak że jo zaro muszą po jakla lecieć. Przida zmachano z roboty, kaj tyż mie nierwujom, krziże mie bolom a tyn: podź na szpacyr, podź na basyn, podź pudymy kaj na wieczerso... A w rzici mom tyn szpacyr, i ta jego

wieczero. Łon zawsze musi wybrać jakiś restojrant kaj smierdzi fetym.. Ledwie przelezemy przez dzwiyrze a mie się już dźwigo. Łon se pojy w lokalu a jo? Dziepiero jak przidymy nazot do dom umia coś zjeś. A że w lodówce nic ni ma inkszego to se zjym łogorka kiszzonego z miodym. Abo paprykarz z dżymym...A co niy wolno mi ? Przinajmni tego smrodu pieczonego niy czuja. Jerona jak jo by tera zjadła takigo śledzika z dżemikiym... Oma ni mocie tam kaj jaki biksy ze śledziami ? No a tyn yno łazi i mi się przyglondo. Aj chopie złyż mi z łoczow.. A wiycie kedy je nojgorzi ? W nocy

Oma: Tyrpie cie?

Cera: A kaj tyrpie! Jo by chciała ale jak kiej tyn kole ciebie leży a dycho ! O tak (*głośny wdech i wydech*) przeca w tym łóżku idzie ory śnim dostać.. Nabzdurnik jakich mało. No same powiydzcie że z takim niy do się żyć ..

Mama: Padosz hic wele mosz ? I na chopa paczeć niy umisz ..A niy myślałaś żeby zrobić se test ?

Cera: Aj mammo, jo niy wierza w jakieś testy z babskich gazet.. Mysłałach żeby iś na jako terapio ale ...

Mam: Test ciężowy gupieloku! Mosz kapszelonta ? Zechciołki ? Hicwele? Niy zastompiłaś ty aby ? No co tak na mie zaglondosz ? Chyba się seksujecie ja ?

Cera: Mammo!!!

Mama: Co mammo ? Ty myslisz że yno młodzi się łonaczom ? To się dowiydz dziołcha że takie omki jak jo tyż się seksujom. W dodatku z twoim łojcym. Wiysz to tyn glacaty. Mało tego twój fater mi na každo rocznica kupuje unterwesa i potym jom sy mnie seblyko. Fajnie tak niy ?

Cera: Fúj! Żeby mi matka o seksie z łojcym godała tego jeszcze nie grali . Jo tego niy chca suchać...

Oma: To można posuchosz ło tym jak się twoja omka seksuje ?

Cera: Ja... yhmm

Oma: A co to omki niy mogom się łonaczyć ? Dziołcha życz a bydzie ci życzone. Nawet na stare lata trefi ci się absztyfikant kery lubi tyn szport, a co ważniysze poradzi jeszcze stanońć na wysokości zadanio!

Cera: Oma ło czym wy godocie ?

Oma: ło seksie a ło czym ? Wiysz co to je pra ? To je wtynczas jak sagi chop ze sagom babom pod pierzinom..... abo na pierzinie...

Mama: Oma stopujcie ! Jaki absztyfikant?

Oma: Edek, Tyn z Klubu Seniora, Gdowiec, zachodzi tu do mnie. I tak... za sama rynka to się yno niy czimiyemy No co tu dużo godać bez modry pile się niy obyńdzie, ale jak weźnie ta pila a jak mie ściśnie...

Mama: OMA!

Babcia:MAMO !

Oma : Wielkie mi mecyje łon je gdowiec, jo gdowa to na co momy paczeć ? łon je za mnom gupi, jo je za nim rada to mogymy chyba być do kupy?

Babcia: łon do cia sam tak przyłazi ja?

Oma: No łazi, przyłazi, wyłazi ale niy wiym jak dugo...

Babcia: Po jakimu?

Oma:Abo to wiysz jak to jest z tymi opkami, zima idzie, ukiołźnie kaj, stare gnaty połomie, w lazarecie go do gipsu wsadzom a jak zalegnie to mu się jakie zapolynie płuc przypynto, to i weźnie i kojfnie bestoż my tak wymyślili że łon się tu przikludzi. Na co mo łazić tam na nazot ? Póki co to hyrski je ale po co ryzykować ?

Mama: I tak bydziecie razym miyszkać ?

Oma: A komu to wadzi ? Jego miyszkanie wynajmnymy, Majeczko pomożesz nom w tym ja ? Piniondz bydzie.. Yno żeby ludzie niy godali że na kryja żyjemy to chyba ślub weznymy. Pieścionek już mi doł. Aleście łostały paf

Mama: Oma mosz ty w barku jeszcze ta cytrynowka ? Moja cera zacionżyła, moja matka się rozwodzi a babcia hajto... Mosz ta cytrynowka bo jo czuja że takich wieści to jo na sucho niy strowia.